



# QUÆSTIO MEDICA.

QUODLIBETARIIS DISPUTATIONIBUS

MANE DISCUTIENDA

IN SCHOLIS MEDICORUM,

Die Jovis 18. Novembris.

M. CLAUDIO BERGER;

DOCTORE MEDICO,

E REGIA SCIENTIARUM ACADEMIA, PRÆSIDE.

*An solus inter Medicos qui sapere potest & fari, verè Medicus?*

I.

**H**OMO, quem *ἄνθρωπος* vocat Philosophus, longè præstantiori supra cæteras animantes conditione spectabilis, corpus sortitus est à Deo Optimo Maximo, non imperiali verbo, ut cætera creata, sed propriâ ipsius manu constructum: Hinc attende, quam iniqui sint rerum Æstimatores, qui ex fortuitis atomorum concursationibus compingi censent. Hæc admirabilis corporis machina, medium hominis constituit; corruptionis verò labem effugit, suique integritatem servat quam potest diutissimè jugi sanguinis motu, cujus suavi rore indefinenter irrigatur, sustentatur, vivit. Sanguis autem vitâ privatur, nec à sanguine sanguis, naturam sanguinis accipit: ab æris puritate fit purior, perfectior, subtilior & auctior ipsi permistus. Corpus ex Animi nobilitate non mediocriter splendescit, cujus regium est domicilium; ille siquidem cogitationis & rationis compos, decus omne suum è cælo repetit, corpus è cæno. Quamdiu autem animus unitur corpori, impari quidem conjugio, non ampliùs sui juris est, huic illigatur & inhæret forti adeo connexu, ut alter alteri bona sua & mala communicet; unde inter ornamenta Medicinæ haud hoc posterius, quod non corporis tantum, sed etiam animi curam gerat; utrumque corpus & animus verum est medicinæ subiectum; utriusque functiones ab utroque malè affecto perperam obeuntur & læsionem subeunt; utrique medicina fert opem, dum corpori prospiciens in sano corpore sanam tuetur mentem, & ejus perturbationes compescendo, animi sanitatem inducit. Infunditur cum vitâ animus, sed divinæ ejus dotes primis tenerisque annis corporeâ mole obruuntur, è quâ emergere hoc opus hic labor est, nisi proprio & naturali lumine, seu notionis ipsi innatæ stimulis incitetur, ut habens in se à naturâ semina quædam & principia virtutum omnium, quarum insitâ vi ad Artem quamlibet comparandam promoveatur, & ad exercitia, studia, contentiones tam prudenter consilia suadingat artis medicæ possidendæ cupidus, ut verè medentis officium implendo, verè Medicus audiat.

**S**APIENTIAE cum medicinâ, medicinæ cum sapientiâ mira societas : quid enim aliud est medicina, quam ex longis meditationibus, observationibus, diurnis nocturnisque studiis & laboribus coacervata sapientia. Ut quis ergo sapiat in rebus medicis, primas rerum causas acri & intento animo intueatur oportet, & quæ sunt involuta, & obscuritate naturæ latent, contempletur, plurimum operæ & industriæ impendens, ut veram & solidam rerum cognitionem attingat : Hominem intus & in cute consideret, quanta sit in eo ex ætate, sexu, habitu, educatione, statu, exercitiis, solo, regione varietas; quam diversis pravorum affectuum tum corporis tum animi generibus oppugnetur, quorum insulibus peropportune occurrendum. Rerum inquisitioni, quas provida natura è sinu suo liberaliter fundit, se totum addicat necessum est, ut & nascentia ubique animalia, plantas, mineralia, diligenter perpendat; intret quoque in rerum naturam, & tanquam assiduus speculator venatorque, subeat abstrusos illius recessus, ut his laboriosis operibus principia rerum abdite latentia in lucem prodeant, & inde veritas velut ignis ex silice excutiat. Facem præbentes medicinæ principes Hippocratem naturæ genium, ejusque voce loquentem, & Galenum fidissimum ejus interpretem perpetuo tenetur evolvere, in quibus vera methodus medendi prægustatur: hæc inter innu-mera dogmata, contraria contrariis curari docet; calorem esse febris essentiam; frigida febribus conducere; symptomatis remedia non deberi; solis alimentis sustineri vires, vigentibus morbis tenui victu utendum : cujus demum methodi præcepta certa & recta ad finem consequendum, ab indicationibus petita, ratione & experientiâ stabilita, supra omnes methodos, quæ nil nisi incongruum, nil nisi fortuitum sonant, palmam auferunt. Nec in veterum dumtaxat, sed & recentiorum indefessâ lectione, magnisque experimentis, artis medicæ scientia fundatur; nulla etenim est ætas, in quâ novarum rerum inventione medicinæ fundus non diffeceat: & quod in hac arte sublimius est, verè Medicus morbum adventantem præsentit, quæ sunt eventura, clarè præmonstrat, & ab imminetibus periculis tanquam Dei manu ægros suos tuetur. Hi sunt nitidi sapientiæ fontes, quibus jucundi veræ medicinæ hortuli sæcundantur, cujus sectator diligens, si cum præclaris illis cognitionibus, præstanti sit indole, & adjunctas habeat virtutes modestiæ, prudentiæ, temperantiæ, gravitatis, liberalitatis, verè Medicus prædicabitur, adeo ad naturam egregiam virtutum & doctrinæ valet accessio.

## I I I.

**I**NGENII lumen æstimatur virtus illa, quâ suos sensus nitide quis exprimere valet; species est sapientiæ; nec parum inde commendationis & gloriæ Medicus sibi conciliat, qui non vulgari rerum omnium quæ medicinam spectant scientiâ imbutus, ut & agendi curandique viâ certiori munitus, tum publicè tum privatim apud omnes suæ sapientiæ probationem exhibet, dum sapere & fari potest quæ sentiat, sensuque sua tam decenter explicare loquendo & scribendo, ut ab omnibus audiatur : ad hunc scopum collimare studet, & libenter amplecti & eligere verba nitida, clara, elegantia; vitare inusitata, obsoleta & plautinam siccitatem redolentia; Aversetur quoque & respuat obscuram diligentiam, ut & barbariem, quæ à Scholis nostris jamdiu exulavit : piaculum quippè est in præsentia, rusticorum more loqui horridè & inficetè; sermo interioris hominis speculum est, & veluti coticula cognitionis & doctrinæ, ut is optime dicere censeatur, si nihil dicat nisi quod benè sciat. Arridet quoque & grata est penè omnibus gravis verborum proprietas, non brevitatis nimium contracta, non magna profusio, & volubilitas, in quibus sanè non consistit locutionis lepos & perfectio : vera etenim Sapientum eloquentia, est sapientia propriè, concisè, & significanter loquens : hoc dicendi ge-

nus retinet, & ut sui proprium sibi arrogat verè Medicus, & ita de omnibus naturà duce sentit, vix ut sciant an majori sit admirationi sermonum elegantia, an rerum scientia, quæ verborum ornatu auctior multò sit & clarior. Præterea hiſce dotibus & ornamentis, tanquam auxiliis efficacioribus verè Medicus perturbatum ægrorum animum ſedat, & ab eo tanquam ab oculis caliginem diſpellit, affertque medicinam conſilii & orationis: neque ſolùm ægrotationum, quæ ſunt corporis, ſed etiam ægritudinum, quæ ſunt animi curam habens, apud ægros *Xacius* ſeu gratioſus habebitur.

## I V.

**A** MEDICORUM familiã jure rejiciuntur, nec præſtantiffimæ hujus artis nomine ſuperbire debent, qui eam ipſam artem quam primoribus labris nequidem attigerunt, audent exercere. Num indignis hominibus & circumforaneis in manum paratorum & notorum remediorum uſus committendus, qui, quæ ſunt parta ſaluti, vertunt in exitium? num æquiùs craſſã medicamentorum ſcientiã, quæ vilibus mancipiis domuum, herbariis, mulierculis communis eſt & trivialis, quam perfectã eorundem cognitione, & iis utendi peritiã Medicus conſtituit? quis neſcit miles exercitatus quantò præſtat inexercitato? nec quocumque is optimus perhibetur artifex, qui materiem pretioſam, & affabrè facta poſſidet instrumenta, ſed qui doctã manu tractare novit, & opera perficere? an quis adeo improvidus adduci poteſt ut credat, hujus ſortis homines, abſque ullã naturæ motuumque ejus obſervatione, quos ſæpenumero interceptiunt, veram tenere & ſecuram ad ſalutem viam, quæ tota fortunã creditur? an unquam temeritas cum ſapientiã commiſcetur? & tamen ad eos homines tanquam ad Deos è cælo delapſos undequaque concurritur: Et plerique Magnatum, ut ſe ipſos ſervent, non expergifcuntur; & exuentes quidquid habent communis ſenſus, eas ſequuntur nugas, ſibi dari verba patiuntur, & hos errores vulgi, peſſimi licet magiſtri, pueriliter fugunt (adeo verum eſt cujuſlibet artis ignaros circa eam cæcutire, neque diſtinguere neque admirari poſſe veros artifices) Nec ſubductã ſecum ratione, hoſce ſtopharum miniſtros audiunt, dum pingue quiddam ſonantes atque peregrinum, novo quodam aucupio, ſpecifica ſeu arcana jaſtant ſibi ſolis cognita, è longinquis regionibus tranſvecta, non re equidem ſed fūco & dolis artificum pretioſa, quorum uſu, ſi credere fas eſt, *ἀθανάτων* promittunt (quid non promittit, quid non novit Græculus eſuriens) & ita miſerè ludificant ſimplicem populum rei novitate percuſſum, qui etiam exiſtimat optimos Medicos qui ſe fingunt Arabas aut Indos, quique longo locorum intervallo famam aucupantur apud ſtultos. Ex horum numero primi occurrunt *ἀρχαίοι & ἀναισθητοί*, quibus pro virtute ſola eſt felix temeritas: alii toti ex facie medici; hi totam ſubſtantiam induti; alii è patriã tranſfugæ & exules; illi planipedes & ſordidi artifices, ſtupore vulgi nobiles facti: quidam demùm impij votorum deſertores, falſarii & perditiffimi nebulones, qui omnes hiſtrionibus ſimiles, perſonam repræſentant quam non ſuſtinent, & nullã medendi face illuſtrati, maximam calamitatem inferunt vitæ; & quod eſt gravius multo ac durius, nihil ex conſcientiã metientes, haud ita magnã mercede negotiantur animas, pro medicamentis pocula venenata miniſtrant, & ſecuro ſcelere, ideoque & frequenti, diris adeo & facinorofiſis miſeros ægros ſuſtinent modis. An ad hæc præclarè geſta ſeu flagitia legumque contemptum qui connivent, nec huic nequitie modum figunt, ſapere præſumentur.

## V.

**V**ULGARE Medici nomen, ſed rarus verè Medicus: benè & ſapienter medentis titulo jure inſignitur, quem recta tenet conſcientia, nec unquam auri fordidoſus amor occupat, cuique largus ineſt & exundans ingenii fons: & dum ad praxim accedit, ſi natus ad medicinam, tum educatus & verſatus in liberalibus ac

bonis disciplinis, tum rebus philosophicis & medicis ad unguem informatus, serio cogitat, idque in animum inducit suum, se perpetuum esse naturæ imitorem paratumque modis omnibus summo illius imperio obtemperare, quæ, licet absque ratione, omnia sapienter administrat, quâ duce errari nullo pacto potest: si naturæ ut & artis Minister, rerum omnium adprimè memor quæ sui sunt muneris, investigat in ægro partem affectam, ubi est sedes morbi, tum partis situm cuius functio læditur, observando quoque quid excernitur, quid retinetur: si morbi causam penetrat, speciem ejusdem & mores per signa propria; solus enim Medicus qui potest cognoscere, potest & sanare: si quemadmodum Duces in bello faciunt, explorat quo potissimum principio æger vocetur in vitæ discrimen, illiusque principii signa bona & mala ponderet & inter se conferat: si præmissis quibusdam salutaribus auxiliis, medicamentorum usus exigitur, horum peritissimus & perfectè sciens, quæ ex toto terrarum orbe deportantur, pauca, judicio selecta, secunda & idonea pellendo morbo & ægotantis solatio præscribit, non imitatus illos *πολυφαρμάκους*, qui magnum ignorantie suæ argumentum exhibent, cum ægotantes suos remedium multitudinem obruunt, illud unum nescientes quod opus est. Si rogatus de morbo ejusdemque causis, non hærens perplexusque, aut admodum perturbatè, misere & jejune, quidquam pronuntiat ut Agyrta, sed eloquium cum suâ sapientiâ jungens, nitido & apposito sermone ad quæsitâ respondet, suæ doctrinæ, eloquentiæ, prudentiæ specimen ubique reddens. Si etiam animus, quem succus herbarum non attingit, laborat perturbationibus, quæ sunt ejus *πάθηματα* seu affectiones, indiget tamen & ille medicina, ab ore sapientius quam ab officinâ deponi censet, quæ verbis amicis & teneris, infirmum animat jacentem erigit, exulceratum solatur. Si demum, quod ei gloriosum ac pene divinum, præteritorum gnarus, præsentium accuratus observator, futurorum vates egregius, uno quasi intuitu complectens universa, tamquam ex aliquâ speculâ prospicit tempestates futuras, easque præcavendo, tempestivis præidiis, idoneâ victus lege, puriore cælo, animi relaxatione, ambulatione, venatione, aliisque moderatis exercitiis corpus recreari curat & alacrius reddi; hancque suam sibi & propriam laudem esse reputat, ut à tergo pariter & à fronte sit oculus, hoc est quam plurimum sapiat, deinde quidquid sapiat, Clienti suo sapiat non sibi; numquid Aureus Vir Ille tibi videbitur, artis integræ possessor eximius, dignissimusque censendus, qui hisce armatus sapientiæ decretis, hacce dicendi virtute distinctus, Magno Imperatori faciat medicinam, ad cuius salutem & acriter & scienter incumbens, ipsi, pietate, sapientiâ, rei militaris peritiâ virtute, autoritate, felicitate supra omnes conspicuo, consiliis suis saluberrimis *παιδαγωγὸν γερῶν* seu nestorcos annos procuret.

*Ergo solus inter Medicos qui sapere potest & fari, verè Medicus.*

Domini Doctores disputaturi.

M. Joannes Baptista Dodart.  
M. Philippus Douré.

M. Franciscus Gouël.  
M. Nicolam Brunel de la Carliere,  
Professor Pharmacia.  
M. Joannes Baptista Doye.

M. Michæl de la Vigne.  
M. Petrus Perreau.  
M. Bertinus Dieuxvoys.

Proponebat Parisiis JACOBUS FOURNEAU Parisinus, Baccalaureus Medicus. A. R. S. H. 1700.

Apud FRANCISCUM MUGUET, Regis & Facultatis Medicinæ Typographum.